



Kamis, 24 Juni 2021

Ogen: Ulangan 8:3



“ Kata Tuhan si pegeluhken ”



Bahanlah kata Dibata jadi kompas i bas kegeluhenta, sinuduhkan dalam si man bentasenta. Adi kata Dibata si ban jadi palas pasti nge kegeluhenta si mehuli sabab lit remot kontrolta si nuduhkan apai si payo si man bentasenta. Kata Dibata si pegeluhken, kata Dibata e nggeluh ras mereken gegeh man banta i bas ndahiken si mehuli ras singena ate Dibata. Sayangnya, Indonesia enda sienteremna kalak si erkiniteken man Tuhan, tapi terkorupsi denga erkiteken terjeng beragama la nggeluh i bas kata Dibata, ietehna apai si la mehuli tapi labo ia mbiar ngelakokensa, kesadaran palsu. Ietehna apai si bujur ras si mehuli, tapi biaren denga ia man manusia asangkan man Dibata emaka labo ia mbiar ngelakoken si la mehuli. Sebab labo ibahanna Kata Dibata jadi gegeh ras geluhna.

Ulangen 8 : 3 nina "La ipelepasna kam kelihen, e maka iberekenna manna man panganndu, pangan si lenga pernah ipanndu tah ipan nini ninindu. IlakokenNa e guna ngajar kam maka labo pangan ngenca sipegeluhken manusia tapi manusia nggeluh erdandanken kasa kai siikataken Tuhan." Kata enda mpersingeti kita maka manusia nggeluh labo arah nakan ras inemen saja tapi Kata Dibata. Sabab Kata e mereken man banta gegeh si mbaru. Sekali jadi lit sada keluarga si atena cerai perbulangen ras ndehara, kai pe lanai lit dalam guna banci ersada sabab enggo ndekah tanggung erkiteken keegoisen sada ras sidebanna. Enggo ndekah ia mpertahanken kebenarena duana ise pe lanai banci nalu nalusa sabab benar akapna ia duana. Dungna konseling ia ku sekalak pendeta, kencana dung konseling, ibereken pendeta ndai sada ayat man bana duana guna irenungkenna selama 2 wari. Oge saja ayat enda janah ertoto kam nina pendeta ndai man bana, emaka kencana 2 wari jumpa ka ia ras pendeta ndai duana, sada persada ikonseling pendeta ndai menaken sindehara, je nari perbulangen. Dung konseling ndai tangis ia bageme duana ikonseling, tahu-tahu kuasa Kata Dibata ndai si ngasup pegeluhkensa, duana ia nggargari dirina janah duana ia nggit erdame ersada ia mulihken sidakepen ras sialem alemen salah. Ertahun-tahun ia la erdame anak pe marpar merap erkiteken keegoisenna duana.